

ВО ЧЕТВЕРГ 8-Й СЕДМИЦЫ ПО ПАСХЕ

В ту же среду пятидесятную вечера

На Господи воззвах: поставим стихов, 6: праздника 3, и Минеи 3:

Стихиры праздника, глас 4-й:

Подобен: Званный свыше:

Се день радости и веселия, свыше явился священным учеником Дух Святой днесь, огненным видом от Отца, и всех просвети: сказатели яви рыбаки мудрецы, якоже Лука написа богогласный, духом нужным исполняяй всяческая. Темже верою дивящиеся, восхваляем Христа Бога нашего многую милость, и крайнее снисхождение.

Пятидесятницу празднуем святою, и Духа силу, и истинную радость, божественныя надежды совершение, и таинства еже от века явившагося нам. Темже и вопием Ти: Содетелю всех, не отыми Духа Твоего от нас, Слово, но с небесе, Спасе, последи, молитвами святых и всеславных честных Апостол Твоих, мир подаждь душам нашим, молимся.

Небеса одушевленная поведают днесь Спасова величия, и весь мир приидоша, ясно проповедати Утешителю божественную силу, и просветиша всю тварь ученьми, еже воспевати неразделимую Троицу едину, в три лица неслиянну. Темже верою празднуем Святаго Духа пришествие, свыше явившееся, и просвещающее концы.

Слава и ныне, глас 7-й:

Утешителя имуща ко Отцу Христа Бога, Утешителю иному пришедшему к нам на землю днесь, Духу Святому верою поклонимся.

На стиховне стихиры, глас 1-й:

Подобен: Прехвальнии мученицы:

Духа Святаго, от Отца исходящаго, и в Сыне прославляемаго, Имже и носятся и держатся вся, и животом содержатся, и живут, и пребывают, и спасаются, богословим: непостижимый Утешителю, мир миру Твоему даруй.

Стих: Сердце чисто созижди во мне, Боже, и дух прав обнови во утробе моей.

Дух Святой, источник всякия благодати, существенно прииде, земныя концы небесною силою, Апостол ради исполнити, и божественною благодатию. Тому возопиим: несказанный Утешителю, мир миру Твоему даруй.

Стих: Не отвержи мене от лица Твоего, и Духа Твоего Святаго не отыми от мене.

Дух Святой Бог, сраслен и сопрестолен Отцу и слову познавается, Свет Пресовершенный от Света просиявый, от Безначальнаго совершеннаго Отца, и

Сыном исходяй. Тому возопиим: Жизнодавче Утешителю, мир мирови Твоему даруй.

Слава, и ныне, глас 8-й:

Егда Духа Твоего послал еси Господи, сидящим апостолом, тогда еврейския дети зряще ужасався ужасом: слышаху бо я вещающа иными странными языки, якоже Дух подаваше им. Невежди бо суще умудришася, и языки в веру уловивше, божественная ветийствоваху. Темже и мы вопием Ти: иже на земли явлейся, и от прелести спасый нас, Господи слава Тебе.

Ныне отпускаеши: **Т**рисвятое. **П**о **О**тче наш.

Тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

[Слава: святаго, аще имать. И ныне: празднику]

И отпуст.

ВО ЧЕТВЕРГ 8-Й СЕДМИЦЫ ПО ПАСХЕ НА УТРЕНИ

На Бог Господь: тропарь праздника глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе. [Дважды.]

[Слава: святого, аще имать. И ныне: празднику]

По 1-й кафисме седален, глас 8-й:

Подобен: Гроб твой:

Се пророческая исполняются проречения, сия бо зарями примрачными покрывый, в будущих явление, яко Бог Утешитель, ныне излился Апостолом богато, теми же и верно поклоняющимся Троице Несозданней.

Слава, и ныне: тойже.

По 2-й кафисме седален, глас 8-й:

Подобен: Повеленное тайно:

Спасовы рачители радости исполнишася, и дерзновение прияша прежде боящихся, яко Дух Святыи днесь свыше сниде на дом ученический, и ин иная глаголаше к людям: языцы бо разсеяшася, видими яко огнь, и сих не опали, но паче ороси.

Слава, и ныне: тойже.

Канон праздника, глас 7, со ирмосом на 8. И святого в Минее на 4. По 9-й песни, експостиларий праздника, дважды.

Песнь 1. Глас 7-й:

Ирмос: Понтом покры фараона с колесницами сокрушая брани мышцею высокою, поим Ему, яко прославися.

Делом, якоже древле учеником обещал еси, Утешителя Духа пославый Христе, возсиял еси миру свет Человеколюбче.

Законом древле проповеданное и пророки, исполнися: Божественнаго бо Духа днесь всем верным благодать излилася.

И минее на 4.

Катавасия: Божественным покровен ...,

Песнь 3.

Ирмос: С высоты силою, учеником Христе, дондеже облецетесь, рекл еси, сидите во Иерусалиме: Аз же яко Мене, Утешителя иного, Духа Моего же и Отча послю, в Немже утвердитесь.

Божественного Духа нашедшая сила, раздельшийся древле глас, зле согласившихся, во едино приличие божественне совокупи, ведением Троицы вразумляющи верныя, в Нейже утвердихомся.

И минеи на 4.

Катавасия: Разверзе утробы ...,

Кондак святого минеи, и икос, и седален его.

Слава, и ныне: седален, глас 8-й:

Подобен: Повеленное тайно:

Спасовы рачителие радости исполнишася, и дерзновение прияша, прежде боящихся: яко Дух Святый днесь свыше сниде на дом ученический, и ин иная глаголаше к людем. Языцы бо разсеяшася, видими яко огнь: и сих не опали, но паче ороси.

Песнь 4.

Ирмос: Смотриай пророк в последняя Твое Христе пришествие, вопияше: Твою услышах Господи силу, яко вся спасти помазанныя Твоя пришел еси.

Во пророцех глаголавый, и законом проповеданный первее несовершенным, Бог Истинный Утешитель, Слова служителем и свидетелем познавается днесь.

Знамение Божества носяй, апостолом во огни, Дух разделися, и странными языки являшеся, яко Отческая Божественная сила грядущая есть, самоповелительная.

И минеи на 4.

Катавасия: Царю царей ...,

Песнь 5.

Ирмос: Страха ради Твоего зачатый Господи во чреве пророков, и рожденный на земли Дух спасения, апостольская сердца созидает чиста, и в верных правый обновляется: свет бо и мир зане Твоя повеления.

Нашедшая сила днесь сия, Дух Благий, Дух премудрости Божия, дух от Отца исходяй, и Сыном верным нам явлейся подавателен, в нихже вселяется естеством святости, в нейже зрится.

И минеи на 4.

Катавасия: Решительное очищение ...,

Песнь 6.

Ирмос: Плавающего в молве житейских попечений, с кораблем потопляема грехи, и душетленному зверю приметаема, яко Иона Христе, вопию Ти: из смертоносныя глубины возведи мя.

От Духа Твоего на плоть всякую, якоже рекл еси, богато изливал еси, и исполнишася всяческая Твоего ведения, Господи, яко из Отца Сын нетленно родился еси, и Дух нераздельный изыде.

И минеи на 4.

Катавасия: Очищение нам ...,

Кондак, глас 8-й:

Егда снизшед языки слия, разделяше языки Вышний: егда же огненные языки раздаяше, в соединение вся призва, и согласно славим Всесвятаго Духа.

Икос: Скорое и известное даждь утешение рабом Твоим Иисусе, внегда унывати духом нашим, не разлучайся от душ наших в скорбех, не удаляйся от мыслей наших во обстояниях: но присно нас предвари. Приблизися нам, приблизися везде Сый, якоже со апостолы Твоими всегда еси, сице и Тебе желающим соедини Себе Щедре: да совокуплени Тебе поем, и славословим Всесвятаго Духа Твоего.

Песнь 7.

Ирмос: В пещь огненную ввержени преподобнии отроцы, огонь в росу преложиша, воспеванием сице вопиюще: благословен еси Господи Боже отец наших.

Ветующим Божественная величия апостолом, Духа действо непщевашеся пиянство неверствующим, имже Троица познавается, един Бог отец наших.

Нераздельное естество православно богословим Бога Отца Безначальнаго, тояжде власти Слова и Духа, благословен еси, зовуще, Боже отец наших.

И минеи на 4.

Катавасия: Согласная возпуме ...,

Песнь 8.

Ирмос: Неопальная огню в Синаи причащаяся купина, Бога яви медленоязычному и гугнивому Моисеови, и отроки ревность Божия три непреборимыя во огни певцы показа: вся дела Господня Господа пойте, и превозносите во вся веки.

Животну свыше бурну носиму гласовне, Духа Всесвятаго дыханию рыбарем, огненных видом язык величия Божия ветийствовашу: вся дела Господа пойте, и превозносите во вся веки.

Яко на некасаемую превосходяще гору, не боящися огня страшаща, приидите и станем на горе Сионской, во граде Живаго Бога, духоносным учеником ныне сликующе: вся дела Господа пойте, и превозносите во вся веки.

И минеи на 4.

Катавасия: Разрешает узы ...,

Поем Честнейшую:

Песнь 9.

Ирмос: Не тления искушением рождающая, и Всехитрецу Слову плоть взаимоотношавшая, Мати Неискусомужная Дево Богородице, приятелище Нестерпимаго, село Невместимаго Зиждителя Твоего, Тя величаем.

На палящей древле огненной колеснице, ревнитель и огнедохновенный радуясь носимь, еже ныне возсиявшее дохновение свыше апостолом являше: от негоже освятившися, Троицу всем сказаша.

Закона естеств кроме, странное слышашеся учеников: единому бо гласу гласящу Духа благодатию, различне оглашахуся людие, племена и языки божественная величия, Троицы ведению научающе.

И минеи на 4.

Катавасия: Радуйся Царице ...,

Ексапостиларий праздника.

Подобен: Небо звездами:

Всесвятый Душе, исходяй из Отца и Сыном пришедый к безкнижным учеником, Тебе Бога познавших спаси и помилуй всех.

Слава: святаго, аще есть: аще ли ни,

Слава, и ныне: праздника

На хвалитех поставим стихи минеи, аще есть:

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 6-й:

Подобен: Трдневно:

Дух всесвятый, Отцу единосущен и Слову, * нашед на ученики, * огненны бренныя * содела языки, * просвещаяй божественною благодатию.

Стих: Сердце чисто созижди во мне, Боже, и дух прав обнови во утробе моей.

Дух Всесвятый обнови в нас Боже, * Егоже древле послал еси учеником Твоим, * Щедре, укрепил еси * исполнити в мире * Твоя спасительная хотения.

Стих: Не отвержи мене от лица Твоего, и Духа Твоего Святого не отыми от мене.

Глаголавый во пророцех иногда Утешителю, * соделал еси ныне небеса,* вещающыя славу Божию, * божественныя Апостолы: * имиже подаждь нам очищение и велию милость.

Слава, и ныне: глас 2-й:

Во дворех Твоих Господи, вернии колена душ и телес преклонше, воспеваем Тя безначальнаго Отца, и собезначальнаго Сына, и соприисносущнаго и Пресвятаго Духа, просвещающаго и освящающаго души наша.

Таже, Благо есть исповедатися Господеву

Трисвятое. И по Отче наш:

Тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

Таже ектения: **П**омилуй нас **Б**оже: **Ч**ас 1. **И** отпуст.

Во Четверг 8-й седмицы по Пасхе На Литургии

Блаженна от канона праздника, обоих творцов песнь 5-я, на 6.

Нашедшая сила днесь сия, Дух Благий, Дух премудрости Божия, дух от Отца исходяй, и Сыном верным нам явлейся подавателен, в нихже вселяется естеством святыни, в нейже зрится. [Дважды.]

Якоже благоволи самовластно, необладанный исходит Дух от Отца, умудряя в языцех апостолы, печатлея живоносное Слово, Отчесильное, сообразное, Егоже Спас рече. [Дважды.]

Слава: Да исцелит убо смыслы от греха, и се устрояше апостолов, Бог Слово всеначальное, пречистый дом, в немже единомощнаго же и ссущественнаго ныне вселяется Духа свет.

И ныне: Да исцелит убо смыслы от греха ...,

По входе тропарь праздника, глас 8-й:

Благословен еси Христе Боже наш, иже премудры ловцы явлей, низпослав им духа святого, и теми уловлей вселенную, Человеколюбче слава Тебе.

И храма святого: И тропарь святого, аще есть, таже кондак храма. **Слава:** кондак святого.

И ныне: кондак праздника, глас 8-й:

Егда снизшед языки слия, разделяше языки вышний: егда же огненные языки раздаяше, в соединение вся призва, и согласно славим всесвятого Духа.

Прокимен, глас 8-й: Во всю землю изыде вещание их, и в концы вселенныя глаголы их. [И до отдания.]

Стих: Небеса поведают славу Божию, творение же руку Его возвещает твердь.

К Римляном Послание, зачало 81: (Рим. 1:28 – 2:9)

Братие, якоже не искусиша имети Бога в разуме, сего ради предаде их Бог в неискусен ум, творити неподобная, исполненных всякия неправды, блужения, лукавства, лихоимания, злобы. Исполненных зависти, убиинства, рвения, лести, злонавия. Шепотники, клеветники, богомерзки, досадители, величавы, горды, обретатели злых, родителем непокоривы, неразумны, непримирителны, нелюбовны, неклатьвохранительны, немилостивны. Нецыи же и оправдание Божие разумеюще, яко таковая творящии достойни смерти суть, не точию сами творят, но и соизволяют творящим. Сего ради безответен еси, о, человече всяк судяй: имже бо судом судиши друга, себе осуждаеши. Таяжде бо твориши судяй. Вемы же, яко суд Божии есть поистинне на творящих таковая. Помышляеши ли же сие, о, человече, судяй таковая творящим и творя сам таяжде, яко ты

избежиши ли суда Божия, или о богатстве благодати Его и кротости и долготерпении нерадиши, не ведый, яко благодать Божия на покаяние тя ведет? По жестокости же твоей и непокаянному сердцу, собираеши себе гнев в день гнева и откровения праведнаго суда Божия, Иже воздаст коемуждо по делом его. Овым убо, по терпению дела благаго, славы и чести и нетления ищущим, живот вечный. А иже по рвению противляются убо истине, повинуются же неправде, ярость и гнев. Скорбь и теснота на всяку душу человека творящаго злое, Иудеа же прежде и Еллина.

Аллилуиа, глас 1-й: Словом Господним небеса утвердишася, и Духом уст Его вся сила их.

Стих: С небесе призре Господь, виде вся сыны человеческия.

Евангелие от Матфеа, зачало 13: (Мф. 5:27-32)

Рече Господь: слышасте, яко речено бысть древним: не прелюбы сотвориши. Аз же глаголю вам, яко всяк, иже воззрит на жену ко еже вожделети ея, уже любодействова с нею в сердца своем. Аще же око твое десное соблажняет тя, изми е и верзи от себе, уне бо ти есть, да погибнет един от уд твоих, а не все тело твое ввержено будет в геенну огненную. И аще десная твоя рука соблажняет тя, усецы ю и верзи от себе, уне бо ти есть, да погибнет един от уд твоих, а не все тело твое ввержено будет в геенну. Речено же бысть, яко иже аще пустит жену свою, да даст ей книгу распусную. Аз же глаголю вам, яко всяк отпущаяй жену свою, разве словесе любодейнаго, творит ю прелюбодействовати. И иже пущеницу поймет, прелюбодействует.

За Достойно: поем и до отдания ирмос:

Ирмос: Радуйся Царице, матередевственная славо: всяка бо удобообращательная благоглаголивая уста витийствовати не могут, Тебе пети достойно: низумевает же ум всяк Твое Рождество разумети. Темже Тя согласно славим.

Причастный: Дух Твой Благий наставит мя на землю праву.
Аллилуиа. [Трижды.]

И по отпусе на литургии глаголется 9-й час по обычаю.